

**Broj** : 01- /15  
**Dana** : 22.09.2015. godine

**SKUPŠTINA KANTONA SARAJEVO**  
**Služba za skupštinske poslove Kantona Sarajevo**

**PREDMET: Poslaničko pitanje Selme Filipović, odgovor, dostavlja se;-**

Zastupnica Selma Filipović je na 6. Radnoj sjednici Skupštine Kantona Sarajevo, održanoj dana 02.09.2015. godine, u okviru tačke Dnevnog reda "Poslanička pitanja, inicijative i odgovori", a u skladu sa Poslovnikom Skupštine Kantona Sarajevo postavila je zastupničko pitanje prema Ministarstvu unutrašnjih poslova vezano za „poduzimanje konkretnih mjera za smanjenje nesigurnosti u Kantonu Sarajevo“.

**Poslaničko pitanje:**

„Kao poslanik u dva saziva Skupštine Kantona Sarajevo više puta sam tražila od Skupštine KS, Vlade KS kao i resornog Ministra da se očitaju, rasprave i donesu potrebne mjere i radnje u vezi sa osiguranjem većeg stepena sigurnosti svih građana Kantona Sarajevo.

Svjedoci smo svakodnevne nesigurnosti, počinjena teških krivičnih djela protiv imovine i ljudi, kao i na čemu posebno insistiram, povećane nesigurnosti u oblasti sigurnosti saobraćaja.

Iz dana u dan naši građani moraju trpiti, naročito u noćnim satima, trke automobila na gradskim saobraćajnicama, lude vožnje motorima, kao i povećan broj otuđenih vozila. Ovo uveliko ometa savjesne vozače i stvara sliku nesigurnosti i nepostojanja pravne države i agencija koje bi trebale provoditi istu, a koje su po ustavu i zakonu dužne da osiguraju sigurnost, red i mir našim građanima.

Tragično je da se naši građani osjećaju sigurno, a to smo mogli čuti iz brojnih izjava u medijima, samo u onim situacijama kada naš glavni grad posjećuju strane delegacije ili visoki državnici i velikodostojnici. Za pohvalu je da naša policija ima resurse da osigura red i mir i sigurnost građana u takvim situacijama, što se argumentovano može potvrditi i po realizaciji posjete Pape Franje Sarajevu ali nema opravdanja da se ta sigurnost okonča momentom odlaska istih iz našeg grada.

Nedopustivo je da grupice obijesnih, kriminogenih i nemoralnih ljudi drže Kanton Sarajevo u opsadi.

Kako drugačije opisati stanje u kojem, u ovom slučaju strani turisti, nedužni izgube život i budu teško povrijeđeni van saobraćajnice, na trotoaru-tramvajskom stajalištu, prekoputa Predsjedništva BiH. Kakvu poruku Sarajevo, kao potencijalni turistički magnet, šalje ljudima koji bi trebali doputovati u njega? Da li smo mi toliko bogata država da nam ne treba novac od turizma, da ne

želimo naplatiti kazne od neodgovornih vozača, da je kaznena politika u korist počinioca, a ne u korist osiguranja sigurnosti i reda itd. Da se neodgovorni pojedinci i kriminogene grupe izruguju i omalovažavaju predstavnike agencija za zaštitu zakona.

U proteklom periodu sam informisana od većeg broja građana Kantona Sarajevo o neprofesionalnom i koruptivnom ponašanju službenih osoba/policajaca na ulicama Kantona Sarajevo. (dobacivanje djevojkama, razgovor o prekršaju uz kafu, razgovor o prekršaju sa traženjem protuusluge u hrani i sl.).

Te Vas ovim putem uvaženi ministre gsp. Kurteš molim da povedete više računa o stanju u redovima Ministarstva unutrašnjih poslova Kantona Sarajevo kako bi što profesionalnije, efikasnije i efektivnije obavljali svoju časnu dužnost.

Na kraju ovim putem se obraćam ministru unutrašnjih poslova u Vladi Kantona Sarajevo gsp. Predragu Kurtešu sa zahtjevom da mi se u što kraćem roku, detaljno, argumentovano i stručno odgovori na slijedeće pitanje, i to:

- Koje konkretne mjere i radnje i u kojem roku će Ministarstvo unutrašnjih poslova Kantona Sarajevo poduzeti s ciljem smanjenja stope nesigurnosti u našem Kantonu““?

### **Odgovor na poslaničko pitanje:**

Policijski službenici Uprave policije, MUP-a Kantona Sarajevo, na osnovu prethodno izvršenih analiza kontinuirano planiraju pojačane aktivnosti u cilju sprečavanja vršenja krivičnih djela, slučajeva narušavanja javnog reda i mira, sprečavanja saobraćajnih prekršaja i zakonskog sankcionisanja.

Pored navedenog posebno, planovi se sačinjavaju za osiguranje svih posjeta i najavljenih javnih skupova u Kantonu Sarajevo, gdje se kroz iste preciziraju potreban broj policijskih službenika kao i konkretni zadaci svakog od njih. Preduzete mjere i radnje planirane od strane policijskih službenika MUP-a Kantona Sarajevo su u ranijem periodu rezultirale lišenjem slobode većeg broja lica koja su dovedena u vezu sa izvršenjem najtežih oblika krivičnih djela (ubojstva, teških slučajeva razbojništva i sl.), što je rezultiralo smanjenjem broja krivičnih djela ove vrste, odnosno hapšenje i procesuiranje nekoliko organizovanih grupa koja su vršila ova krivična djela. Pored navedenog, kada su u pitanju krivična djela tzv. uličnog kriminala Uprava policije MUP-a Kantona Sarajevo na osnovi izvršenih procjena, dnevno, sedmično ili mjesečno planira sprovođenje potrebnih mjera i radnji u cilju sprečavanja krivičnih djela ove vrste, kao i identifikaciji i pronalasku izvršilaca istih. Ovo je stalni zadatak policijskih službenika Uprave policije, te se na osnovu dosada preduzetih mjera i radnji može zaključiti da je došlo do osjetnog smanjenja svih vrsta krivičnih djela na području Kantona Sarajevo, a koja su do sada mogla izazivati uznemirenje kod građana.

Ovdje govorimo o izvršiocima koji su se udružili radi vršenja krivičnih djela, te uz punu koordinaciju sa nadležnim tužilaštvima, sve je veći broj identifikovanih i zakonski procesuiranih lica koja su do sada vršila ova krivična djela, što je rezultiralo smanjenjem krivičnih djela na području Kantona Sarajevo u svim oblastima kriminaliteta. Ovdje treba napomenuti da postoje pojedinačni ili izolirani slučajevi nezakonitog postupanja pojedinaca koji svojim činjenjem krivičnih djela mogu izazvati uznemirenost kod građana, a li se tu uglavnom radi o slučajevima koji se unaprijed nemogu predvidjeti te je nemoguće u takvim slučajevima planirati i preduzimati preventivne mjere koje bi spriječile ovakve događaje.

Policijski službenici Uprave policije MUP-a Kantona Sarajevo, osim planskog preduzimanja mjera i radnji prema određenim grupama koje vrše određena krivična djela, imaju stalni zadatak da rade na preveniranju kako prema izvršiocima krivičnih djela, tako i licima koja su sklona činjenju prekršaja iz oblasti javnog reda i mira i saobraćaja.

Kada je u pitanju segment sigurnosti svih učesnika u saobraćaju, treba napomenuti da policijski službenici Uprave policije, MUP-a Kantona Sarajevo svakodnevno kroz redovno obavljanje poslova i zadataka preduzimaju sve potrebne mjere i radnje protiv učesnika u saobraćaju koji svojim postupcima čine prekršaje iz ZOOBS-a na putevima u BiH. Također, policijski službenici Uprave policije na osnovu prethodno sačinjenih analiza, planski sprovode pojačane akcije kontrole saobraćaja, s posebnim akcentom na činjenje težih prekršaja iz ZOOBS-a na

putevima u BiH, od strane svih učesnika u saobraćaju, a sve u cilju smanjenja broja saobraćajnih nezgoda i podizanja stepena sigurnosti svih učesnika u saobraćaju.

Ministarsvo unutrašnjih poslova Kantona Sarajevo, je također u cilju podizanja stepena sigurnosti svih učesnika u saobraćaju na još viši nivo, u Avgustu 2013.godine sačinilo Elaborat proširenja sistema stacionarnih radarskih uređaja sa fotoregistracijom u Kantonu Sarajevo.

Kriteriji za izbor lokacija na području Kantona Sarajevo na kojima bi se vršilo postavljanje i montaža stacionarnih radarskih uređaja, obuhvatali bi navedeni parametri:

- kritične dionice puta;
- broj crnih tačaka;
- broj saobraćajnih nezgoda;
- broj smrtno stradalih lica;
- broj povrijeđenih lica;
- visina materijalne štete;
- implikacije prekida saobraćajnog toka;
- blizina škole ili drugih važnih objekata

Dana 15.05.2015.godine, u organizaciji Premijera Kantona Sarajevo, organizovana prezentacija „Elaborata o proširenju stacionarnog radarskog sistema u Kantonu Sarajevo”, na kojoj je bio prisutan ministar MUP-a Kantona Sarajevo sa saradnicima i ministar Ministarstva saobraćaja Kantona Sarajevo.

Nakon održane prezentacije, MUP-a Kantona Sarajevo je uputio inicijativu Vladi Kantona Sarajevo za razmatranje „Elaborata o proširenju stacionarnog radarskog sistema u Kantonu Sarajevo”, s ciljem usvajanja i donošenja odluke o implementaciji istog.

Vlada Kantona Sarajevo na svojoj 16. sjednici održanoj dana 27.08.2015. godine prihvatila je inicijativu Uprave policije, MUP-a Kantona Sarajevo, za realizaciju „Elaborata o proširenju stacionarnog radarskog sistema u Kantonu Sarajevo” i svojim Zaključkom, broj 02-05-23464-36/15 od 27.08.2015. godine, zadužila MUP Kantona Sarajevo da obrazuje radnu grupu koja će biti zadužena da pripremi prijedlog relacije Elaborata.

S hodno Zaključku Vlade Kantona Sarajevo, Ministarstvo unutrašnjih poslova Kantona Sarajevo, je pokrenulo inicijativu o formiranju radne grupe ispred ovog Ministarstva koja će imati zadatak da pripremi prijedlog realizacije sačinjeno Elaborata.

S poštovanjem,

**MINISTAR**

**Predrag Kurteš**